

**UPE Akan Distruktur Semula Tahun Ini Untuk Tangani Perubahan Pesat Ekonomi
Bernama
20 Februari , 2012**

KUALA LUMPUR, 20 Feb (Bernama) -- Unit Perancang Ekonomi (UPE) di bawah Jabatan Perdana Menteri (JPM), bakal melalui penyusunan semula struktur organisasinya tahun ini bagi memperkukuh dan meningkatkan lagi keberkesanan unit itu dalam menghadapi perubahan ekonomi yang mencabar.

Menteri di Jabatan Perdana Menteri Tan Sri Nor Mohamed Yakcop berkata menerusi penyusunan semula unit itu, ia akan berupaya merancang strategi yang bersesuaian dengan perubahan pesat masa kini.

"Penstrukturan semula organisasi UPE dengan penjajaran semula seksyen-seksyen di bawah Timbalan-Timbalan Ketua Pengarah masing-masing, akan membolehkan unit itu berfungsi dengan lebih fokus terhadap pengagihan semula beban tugas menggunakan perjawatan sedia ada supaya menjadi lebih optimum," katanya.

Beliau berkata demikian ketika berucap pada Majlis Perhimpunan Bulanan UPE di Jabatan Perdana Menteri, di sini Isnin.

Nor Mohamed berkata iklim ekonomi dunia yang tidak menentu, khususnya di Eropah, sudah pasti memberi kesan terhadap usaha kerajaan untuk mencapai sasaran pertumbuhan ekonomi negara yang ditetapkan sebelum ini.

Justeru itu, seluruh warga UPE perlu melipatgandakan usaha membangunkan ekonomi negara bagi memastikan negara berada pada kedudukan yang baik untuk memenuhi aspirasi menjadi sebuah negara maju berpendapatan tinggi menjelang tahun 2020, katanya.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=646674>